



O Volapükans Valöpo!

Äsä epenom Cifal in pened oka, keli ereidols dü yanul, binobs net u bevünet. Do binon net smalik, dalabon too kulivi, literati äsi jenavi lönikis. Bevü püks mekavik, Volapük labon fluni patik.

Ven getols gasedi obsik mul pos mul, sevobs, das köv ninükon gasedi, bi su köv stanons pleidiko vödis: FLENEF BEVÜNETIK VOLAPÜKA. Sis yels deg vöds at epubons. Ab anu stäpedöm, keli ägebob, ebrekon, ed emutob mojedön oni. Äsä ulogobs anikna, magod no äbinon ai klilik. Binos äs per flena gudik pos yels so mödiks!

Ab äsa sevols oni gudiko, disin oba binon ad propagidön Volapüki ai. Sekü atos, edunob propagidömi nulik ad kleibön sui kövs, ed ologols mäki nulik su köv, kel ninükon gasedi at.

Ad kis dünön-li Volapük? Mäk nulik nunon alane, das Volapük binon balido pük bevünetik, e das stud ota dünön fovo ad gudükumön täläkti.

Ekö vödem Volapükik: „Vilols-li gudükumön täläkti olas? If si, lärmolsöd Volapüki. Pük at bevünetik ophuükon mödo visedäli olsik. Kvaliets somik tirädons mesedi gudik e vobädons kotenükami dibik. Pats mödikum de 24 Staniwell Rise, Scunthorpe, DN17 1TF, Linglän.”

Ya etradutob löpikosi ini Deutänapük, Fransänapük e Linglänapük. Potacalans, äsi penediblinans, ed i utans, kels fädo ologons kövis, oseivons Volapüki.

Valikosi Gudikün Oles ed Olikanes

sedom

Ralph

GRAMATAGUL

Volapükaflen nulik vilom sevön, kikodo äzesüdos ad revidön Volapüki rigik ela Johann Martin Schleyer. Sagom, das nog dabinons flens Volapüka, kels neai ezepons revidi at.

- - - - -

Pösod gudikün ad gespikön säki at binom revidan it, sevabo: Dokan Arie de Jong. Ekö vöds oka:-

„Dinäds difik ekodons, das mödikans edeflekons okis de Volapük, e das pük at eperon mödikosi fluna okik. Bal kudas atosä sio ebinon fomam vödas, e pato fomam koboyümavödas. Pö fomam vödas nulik e pö fomam koboyümavödas, el ‘Schleyer’: datikan letälenik Volapüka sevabo ägebädöm brefükamis somik, das vöds at tefü licin okas ivedons fikuliko sevädoviks. Dub atos vöds nulik Volapüka ivedons fikuliko memidoviks ed älonülons memäle flagis vemo töbikis. Kludo if ävilobsöv, das Volapük ödagetön dönu in kosäd bevünetik pladi, kel duton lü ok, e keli i meriton, täno mu balido vödastok Volapüka ömutonöv paxamön e pamenodön ütöpo, kö özesüdosöv. Ab bi fomam vödas klülo sötön pastabön dub noms gramatik kuratiko pelonöls, id äzesüdos ad revidön staböfo gramati Volapüka. Bligädi at, sevabo : e revid gramata e revid vödas Volapükik edunikob. Bü del 31id mätzula yela 1929, kludo tü timül mö yels ebo luldegs pos datik Volapüka fa ‘Johann Martin Schleyer,’ vobod oba äblümon.

Ün prilul yela 1929 evisitob söli : ‘Profäsoran Dr. Albert Sleumer,’ cifal Volapükaneftä ä dilekan Volapükakadäma ad jonön ome vobod oba, ed ün setul yela ot obs bofik evegobs lü ‘Wienacht’ (in Jveizän) ad bespikön us ko söl : ‘J. Sprenger’* vobod oba e dinädis votik Volapüki tefölis. Pläamü dins anik äkanoy baicedön tefü ceds obik. Votükamis anik, kels äzesüdons, elüblinob ini gramat ed ini vödabuk, ven äbinob dönu in lomän oba*, sodas gramat at gegivon utosi, kelosi elonobs kilo fifümiko pö kobikam obas in ‘Wienacht’ de del 17id jüesa del 19id setula, yela 1929.

(Noet redakana: Lomän dokana de Jong äbinon Nedän; Söl Sprenger äbinon man liegik, kel ävilom propagidön Volapüki me monem oka).

II:11:2005

RIMOD SPÄKIK

Ai ävilof kolkömön späki.
Ya ivisitof kasedis vönik;
Vano! Bi us no älogef mäki.
Älönedons deadanöps gönik,
Neito – vano! Äfvöf säki
Valöpo da län pö vestigs lönik.

Ün göd seimik äbinof in cem;
 Äreidof buki mu späkiki.
 Sunädo pubon man – utan nen nem.
 Sakom ofe me vög mu fäkiki:
 „Kredol-li pö späks?” Ägespikof vom:
 „Fümiko no!” e man änepubom!



KIN ELOGON-LI VIENI?

Fa jiel Christina Rossetti

Kin elogon-li vieni?
Ni ob, ni ol.
Ab ven bledem dremon,
Us vien binon.

Kin elogon-li vieni?
Ni ol, ni ob.
Ab ven bims biegon,
Usao golon vien.



TUVEDOT RÄTA YANULA

**Kikodo Lamerikānans gebons-li sobi mōdikum ka Nedānans?
Bi dabinons Lamerikānans mōdikum, ka Nedānans!**

Ekō rāt nulik: – Lel su lulak telon tefū gretot tū del alik. Neodon delis teltum ad fulūkōn lulaki. Kitimo lulak obinon-li lafafulik?

AI ÄVILOB SLIPÖN...

Pluamanum obas labobs seni, das vilobs slipikön pos neit mu latik. Ab kisi dunolöv-li, if, del pos del, steifülo ad galön ven neodol ad dunön vobodis mu veütikis?

Jiel 'Julie Tideswell' sefov legudiko, vio atos kanos fikulükön lifi nomik. Äpenemof trögiki e stupädiki, e flens äsagons, das äbinof dis flun drogas, bi äslipikof in tops bisarikün.

Labof sanasäkädi, sevabo: 'narkoläpsid'; jenöfo kanof slipikön seimo e seimüpo; lindifos, kisi dunof. Slipatup ofa sinifon, das igo if islipof ädelo dü düps teldeg, kanof too slipikön sunädo.

Bäldotü lifayels degfol, el 'Julie' ädasevof, das ilabof säkädi somik. Äslipikof in tidacem ed igo äfalof de stul oka. Tidans ofa änunons pales ofa, das no äbinof küpälik, bi äslipikof dü tidadüps. Pö niver, säkäd igretikon. Äslipikof so suvo, das ti iperof pladi oka us.

El 'Julie' ägolof ad konsultön sanani, kel äsagom, das säkäd ofa äbinon sek züäda niverik e voba tu mödika. Ab säkäd ofa äbadikumon, ed igo islipikof dü täv su plad pödik motorasaikula! Dü vobabespik pimükükof ven islipikof id us. Imutof i klemön vobi as sekretan, bi ädredof ai ad slipikön ven ävabükof toodi.

„No äkanob kipön vobodi nomik, e fino ävedob voban büfik - seko äbinob in top bal te dü vigs anik e nek ga äküpedon osi if äslipikob semikna. Äkanob ai sagön, das äbinos plödakösömik. Ab bi säkäd at äfövon ai, ätikob, das kod atosa äbinon jenöfo näüt in бүр. Sekü atos, äprimob ad padafomön as lekälädan. Do anu vobob in malädanöp as lekälädan, büä pädaceidol, äslipikob suvo in malädanacems. As säkusadakod, samo, äsagob, das äsufob migräni, u äcedidob, das äbinob sveniälilik. Ästeifülob vemo ad galön: äskutob logodi oba me vat, änüpladob tamedis ini kaf oba, ed äknibob küdis oba sovemo, das äsufob blütotis nejönik.”

„Ab vaniko. Fino jikontrolan äküpedof osi, e sosus isäkof obi, va valikos ägudos lä ob, idrenob süpo lo of: poso isludob ad dunön bosi tefü fikul at. Läbo ästudof slipitupis, ed äsevofo bosi dö atos. Äflagof obe ad visitön sanani oba.

Sanan äbinom mu yufiälik. Ikomandom obe ad rajanön konsäliidadüpi ko patädan, e do imutob stebedön timi lunik, ifrutos obi mödo.

Fino pävüdob fa patädan ad stebön in malädanöp dü neit bal, sodas äkanom kontrolön slipasamis obik: sekü atos, päceidob as narkoläpsidan.” Anu el ‘Julie’ slugof piluli bal a del, kel galükon ofi.

„Piluls, äsi yuf sanana obik e malädanöpa, egivons obe lifi nulik. Nen ons no kanoböv vobön u kosädön ko votikans. Matan oba pänofülom, bi äslipikob ven äbinobs kobo: äcedom, das pänaütob sogü om. Yels ebinons mu fikuliks pro ob; sekü säkäds oba, äsufob timis nenkurada, bi no äkanob ai galön. Ven mens änemons obi pösodi trögik, äbinos mu dämbik obe, bi no ädasuemons, das ökanos binön bosi fefikum.

Bü nelunüp ekolkömob julaffeni büik, kel äsagof: „Ätikobs, das äbinol dis flun drogas, bi ai äslipikol. Ed atos jonos nennoli menas dö stad at.

Pleidob, bi no eperob cali oba sekü fikuls oba. Jikälän in malädanöp timü lekäl oba, äsäkof obi tefü vob oba, Ven ägespikob ofe, das äbinob lekälädan, päsupädofo, bi, äsä äsagof, narkoläpsidans plöpons nesuvo pö cal, bi no kanons studön saidiko ven ai slipikons. Binos äsif petakedükoy-la, e sosus galikoy, no kanoy futagolön, bi lögs binons so fibiks. Zuo slipikoy dibikumo e primoy sunädo ad drimön.”

Do sanastad ela ‘Julie’ no kodon ofe fikulis plu, labof demädi pro utans, kels labons malädi at nen sevön osi. Ab yuf dabonon pro narkoläpsidans: anu el Julie vabükof toodi love fagots gretik!

TREN LŪ ZIFIL 'CAPELLA'

Fa hiel Wilfred E. Reeve

Valikans, kels kōsōmons ad tāvōn nomādiko medū tren bevū dom e būr okas, nendoto olabons plaki ot ad logōn, del pos del, ketāvanis ot. Suvo geboy onis te ad sevōn, va latikoy. Binos mu bisarik, das kosād ko ketāvans somik difon bevū pōsod bal e pōsod votik. Ko anikans vifo flenikoy; votikans blibons te sevādans, kels spikons dō dins pemiedūkōl lifa onsik; mōdikans spikons te dō famūl onsik, votikans te dō būro. Ab dabinons nog votikans, too, kelis kolkōmoy suvikūno, ab – sekū kod no pesevōl – neai jonons mali smalikūn, das elogons okis būo. Seadoy in tren nilū ons, ab blibons ai nesevādans lōlōfik.

Dū yels mōdik ātāvob bevū zifil 'Capella' e cifazif, ab tū soar et, āgetāvob lū dom obik tō 'Capella.' Tren ābinon saido fulū mens. Bevū ons ābinon balan, keli āmemosevob, do neai ispi kotobs ode. Āseadom oki nilū ob ed āprimom ad reidōn soaragasedi. Elūkōmōls lū zifil 'Rhodomon,' mens valik in dilād obsik ādexānoms, plā man at ed ob. Vom bāldik labū herem gedik ānūkōmof ini dilād, ed āseadof oki in gul ta ob. Pos minuts anik, vom āsākof obe:

„Verātob ad tikōn, das tren at vabon lū 'Capella?'”

Ālūlogob ofi laidiko dū sekuns anik būā āgespikob ofe:

„Sil tren at vabon lū 'Capella.'”

Ādanof obi e no āspikof plu.

Pos tim brefik, too, āsagob ofe: „Lōdol-li tō 'Capella?’”

Ālūlogof obi ed āgespikof : „No!”

„Ab sevol-li zifilī at?”

„Sil!”

Ba älödöl-li tö 'Capella' büo?"

Äjinof pasüpädön, das älaidulob ad besäkön ofi, e flanao loga obik, äküpedob, das man nilü ob id äjinom paneodülön fa spikot obas. Vom äzogof dü timül ed ägespikof fino:

„Si! Bū lunüp älödob tö 'Capella.'"

„Pals ola no plu belödons-li zifili?"

Vom no äjonof sidini, ab dredi, ven äbespikob ofi, e man äkögom boso ad jonön neodüli oma. Vom ägivof obe lebeanotodoti, too äfovob ad lülogön ofi. Äjinof äs nim pefanöl, ab fino äsagof, ti seifölo: [

„Bofikans edeadons."

Dü minuts anik äseiloy in diläd, ab dönu äklienob obi lü vom labü herem gedik ed äsagob:

„E matan olik-li?"

Älülögob obi me logs sunädo flamöls:

„Id om edeadom."

Suno älükömobs lü 'Capella.' Vom änexänof, ab äblibob in gul oba. Sosos tren dönu ämufon, man esagom obe:

„Top et äbinon 'Capella.'"

„Si! top et vo äbinon 'Capella.'"

„Ab sis yels deg seväda obsik, ai änexänol tö 'Capella.'"

„Dü ti yels luldeg änexänob tö 'Capella,' ab adelo otävob

lū ‘Venuto.’

„Kikodo ābespikol-li so sufidalaiduliko vom i et?”

„Bi binof matan oba.”

„Matan ola-li?”

„Si! No elogob ofi sis yels foldeglul. Dū tim et ekolkōmob vom i yunik, kel ābinof lāb soelik lifa obik. Matan oba etūvof kosādi obas, ed ün del seimik ekolkōmof ofi in dom obsik. Āzanof vemo e fino matan obik egleipof neifi ed edeadūkof lōfābi oba. Ābinof in fanābōp dū yels degluI. Pos libūkam ofa isteifūlob ad tuvōn ofi, ab neplōpo jū adel. Imemosevob ofi nen fikul, ma jino no isevof obi. Anu, ga niludob, das ovisitof dom i obik.”

„E kikodo tāvol-li lū ‘Venuto?’

„Bi blod lōfāba oba lōdom us, e dalabom pistoli. Ekō! elūkōmobs lū ‘Venuto.’

Enexānob in stajon. Man āklienom oki se fenāt, ed āvokādom: „Onunob poldabūrī.”

„Lindifos obe. No sevōl ni nemi, ni ladeti oba.”

E tren ādevegōn de ‘Venuto.’



KUN NENYUFIK

Lefilapoldans ādedietoms plu ka dūpi bal ad savōn kuni, kel ifalon ini svimōp! Nim ābinon nenyufik in svimōp at privatik nilū zif ‘Taunton’ (Linglān) Fino ākanoy setirōn oni se vat. Kun ānenviodon.